



**JUDICIAL SYSTEM MONITORING PROGRAMME**  
**PROGRAMA MONITORIZASAUN SISTEMA JUDISIÁL**

*Komunikadu Imprensa*  
*Distritu Oe-Cusse*  
*23 Juñu 2014*

**Komunidade Suku Lifau apresia treinamentu kona-ba demokrasia no prosesu halo lei iha Timor-Leste**

Iha 19 Juñu 2014, JSMP liu husi Unidade Programa Observasaun Parlamentu (POP) hala'o treinamentu ba lider komunitáriu no komunidade sira iha Suku Lifau, Sub-distritu Pantai Makassar, Distritu Oe-Cusse. Partisipantes sira hamutuk ema nain 30, kompostu hosi feto 16 no mane nain 14.

Partisipante ba treinamentu ne'e aprende kona-ba demokrasia, konseitu jerál kona-ba prosesu halo lei, no oinsa povu bele partisipa. Treinamentu ne'e divulga informasaun kona-ba separasaun poder entre orgaun soberanu sira hanesan knaar Prezidente da Repúblika, Parlamentu Nasionál, Governu/Ezekutivu no Tribunál sira, liu-liu knaar Parlamentu Nasionál nian iha prosesu halo lei, foti desizaun politika no fikalizasaun.

*“JSMP fiar katak liu husi programa treinamentu ne'e, lider komunitáriu no komunidade sira bele iha koñesimentu adekuada kona-ba demokrasia no oinsa atu bele partisipa iha prosesu halo lei, fikalizasaun no foti desizaun politika, tuir komunidade sira nia kbiit no possibilidade, liu-liu bele hatene diferensia hosi orgaun soberanu sira ida-diak nia knaar,”* dehan Diretór Ezekutivu JSMP, Luis de Oliveira Sampaio.

Xefe Suku Lifau Sr. João da Costa, iha ninia abertura haktuir katak treinamentu ne'e importante tebes tanba foin primeiravez aprende kona-ba demokrasia no knaar orgaun soberanu sira iha sira nia suku. Tanba ne'e, nia konsidera katak informasaun ne'ebé mak JSMP hato'o kona-ba oinsa povu bele partisipa iha prosesu halo lei, fikalizasaun no foti desizaun politika, importante tebes ba sira.

Iha sesaun husu no hatan, partisipante sira preokupa kona-ba demokrasia tanba gosta liu ho influensia kultura hosi nasaun seluk nian maibe ho treinamentu ne'e sira bele komprende liutan oinsa sira bele adapta an ho kultura rai seluk nian no kultura lokal ka timor nian. Partisipante sira sujere ba JSMP atu iha futuru bele kontinua habelar no hakle'an liután lider komunitáriu sira

seluk nia koñesimentu kona-ba demokrasia, prosesu halo lei, fiskalizaun, foti desizaun politika liu-liu asuntu kona-ba separasaun poder ba knaar orgaun soberanu sira.

JSMP observa katak iha treinamentu ne'e partisipante hotu iha interese boot atu aprende no rona ho diak bainhira fasilitador sira apresenta matéria. Ne'e hatudu katak sira konsidera informasaun sira ne'e importante ba sira.

Treinamentu ne'e realiza ho apoiu finanseiru hosi *United Nation Democracy Fund* (UNDEF).

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883|77295795 Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPTl